

«En nagin cas be ina spassegiada»

DA GION NUTEGN STGIER / ANR

■ **Be ina chausa furmala è stada la nominaziun da las candidatas e dals candidats per las tschernas federalas en sis mais. Cuntinuar cun il schlantsch da la pld en auters chantuns, quai saja la basa per avair danovamain in represchentant en il cussegl naziunal.** Bunamain 100 delegads èn stads preschents a la radunanza da nominaziun. A l'entschatta da quella ha *Bruno Claus*, il president da la pld grischuna, ditg: «Nus essan en plaina prosperitad.» Tar las elecziuns chantunalas a Basilea, Turitg, Lucerna, en il Tessin ed en il chantun Appenzell haja la pld guadagnà 14 sezs ed uschia confermà ch'ella saja la partida da l'economia e la partida dals liberals. Bruno Claus ha menziunà che ussa saja er en il Grischun da cuntinuar cun quel tgatsch per avair success tar las elecziuns naziunalas dals 18 d'october da quest onn. «Er cun quel tgatsch èn las elecziuns en nagin cas be ina spassegiada per nus», ha punctuà Bruno Claus. El saja dentant persvas che

cun l'engaschament da mintgin saja pussaivel da trametter danovamain dus represchentants da la pld grischuna en la chasa federala.

In um cun in profil politic

Cun in ferm e lung applaus han lura ils preschents nominà *Martin Schmid* sco candidat per il cussegl dals chantuns. Ils davos quatter onns haja el fatg buna lavur a Berna, el saja ina persuna cun ina gronda experientscha, in um cun in profil politic e cunzunt in represchentant dal pievel che enconuschia ils dossiers, ha ditg Bruno Claus. En in discurs cun *Urs Marti*, il deputà e president da la citad da Cuir, han lura las candidatas ed ils candidats per il cussegl naziunal gì occasiun d'argumentar pertge che sia tscherna saja giustifitgada. La pld grischuna vul vegnir tar bleras vuschs grazia a duas glistas, ina glista liberala ed ina glista economica. Vitiers vegn lura anc la glista dals giuvens liberals. Quai che pertutga ina eventuala colliaziun da glista cun autras partidas saja anc da ceder, ha accentuà Bruno Claus.



Candidatas e candidats da la glista liberala: Karin Niederberger, Urs Cadruvi, Maurizio Michael, Vera Stiffler e Hans Peter Michel (da san.).

FOTOS G. N. STGIER

Hans Peter Michel duai ir a Berna

La direcziun da la partida aveva già fixà la successiun dals nums per las elecziuns dal cussegl naziunal ed ils delegads han sustegnì la proposta da la direcziun. Sin piazza in da la glista liberala è sco supponì *Hans Peter Michel*, l'antierur depu-

tà, president dal cussegl grond e landamma da Tavau e sin piazza dus suonda *Karin Niederberger*, la presidenta da la Federaziun svizra dals jodladers. *Urs Cadruvi*, il secretari general da la Lia Rumantscha, è sco terz sin la glista, sin il quart plaz è *Vera Stiffler*, la deputada da

Cuir e sin piazza tschintg figurescha cun *Maurizio Michael*, il deputà da la Bregaglia, in represchentant da la region taliana.

Far vuschs en tuttas regions

A la testa da la glista economica è cun *Angela Casanova*, la deputada da Domat, ina experta da finanzas. Cun il deputà ed interpretider *Michael Pfäffli* da San Murezzan è in represchentant da l'Engiadin'Ota sin il segund plaz. *Christian Kasper*, il deputà ed impressari da l'Engiadina, è sco terz sin la glista economica. *Raphaela Hollinger*, la studenta da Farschno, suonda sin il quart post e *Rudolf Kunz*, il deputà da Cuir ed advocat, duai cunzunt far vuschs en la chapitala grischuna. Decidi ha la pld lura er anc las parolas per las proximas votaziuns federalas. Ella sustegna la diagnostica da preimplantaziun e trais giadas in NA per las ulteriuras votaziuns naziunalas, l'iniziativa davart stipendis, l'iniziativa davart la taglia sin l'ierta sco er la revisiun da la lescha da radio e televisiun.